

## **АВГУСТА В 12-Й ДЕНЬ.**

**СВЯТЫХ МУЧЕНИК ФОТИЯ И АНИКИТЫ**

**ПОЕТСЯ ЖЕ С НИМИ СЛУЖБА И ПРЕПОДОБНАГО ОТЦА НАШЕГО МАКСИМА  
ИСПОВЕДНИКА**

**НА ВЕЧЕРНИ**

**На Господи, возвах: стихиры мучеников, глас 4-й**

**Подобен: Дал еси знамение:**

**О**гня не убоястеся, \* ни секущаго орудия, \* ни ярости свирепыя без ума претящаго, \* ни стремления львов, \* ни врения конобнаго, \* ни удов отсечения, \* ни смерти горькия ответа, \* вас безсмертствующаго, \* к Богу безсмертному славно отсылающа, \* страдальцы доблии.

**Б**лаженную и всечестную \* и достойно желаемую кончину восприясте \* и вечныя, доблии, надежды, \* изливаете нам токи чудес, \* опаление отъемлюще \* страстей душ и телес \* благочестно молебный праздник ваш \* всегда совершающих, прехвальнии.

**Ф**отий славный \* и Богомудрый Аникит, \* двоица вседобляя, \* Троичную светлостию украшаема \* и преиспещрена ран добротами, \* со Ангелы присно радуется, \* и иже верою славное \* и священное их страдание празднующим \* подают просвещение и милость.

**Ины стихиры преподобнаго, глас тойже.**

**Подобен: Яко добля:**

**З**а милосердие бывша Человека, \* якоже благоизволи, \* во дву хотению, \* действиях же разумеваема, преподобне, \* проповедал еси, Максиме, \* заграждая скверных незатворенная уста \* единовольна, единоедейственна Сего славящих, \* искушением диавольским, \* злобу простершаго.

**Ж**илами учений твоих \* Пирра, отче, удавил еси лжуца, \* Максиме, безумнаго \* и гонения претерпел еси \* и скорби, приснопамятне, \* ураняемь зело, и язык урезаемь, \* и юже всегда к Богу простираемую Божественную руку, \* еюже пиша, совершил еси высокая словеса.

**С**корописца якоже трость, \* омочена Духом, \* святой бысть, блаженне, язык твой, \* добропишущь благодатию \* на скрижалех сердец наших \* закон Божественных добродетелей, \* и учением известие, \* и воплощение во двою Существо человеком \* и во единой Ипостаси явится восхотевша.

**Слава, глас 8:**

**М**онахов множества, \* наставника тя почитаем, отче наш Максиме: \* твоею бо стезею воистинну право ходити познахом. \* Блажен еси, Христу работав, \* и вражию обличил еси силу, \* Ангелов собеседниче, преподобных сопричастниче и праведных, \* с нимиже молися Господеву \* помиловатися душам нашим.

**И ныне, глас тойже:**

**М**рак законный \* светлый преображения прият облак, \* в немже Моисей и Илия бывше \* и пресветлыя славы сподобышеся, Богови глаголаху: \* Ты еси Бог наш, Царь веков.

На стиховне стихиры, глас 2.

Подобен: Доме Евфрафов:

**К** горе Фаворстей \* приступим усердно, \* видети славу \* всех Царя Христа, \* Избавителя нашего.

**Стих:** Твоя суть небеса, \* и Твоя есть земля.

**Я**вился еси с Моисеом \* и Илиею, Спасе мой, \* и учеников лучшие \* на горе Фаворстей \* облистав паче солнца.

**Стих:** Фавор и Ермон \* о Имени Твоем возрадуется.

**С**лышаху Отеческий глас, \* произвестующ славу Твою, \* Спасе мой, \* и учеников лучшие \* ницы на землю падаху.

Слава, глас 6:

**П**реподобне отче, \* во всю землю изыде вещание исправлений твоих, \* тем на Небесех обрел еси мзду трудов твоих, \* демонския погубил еси полки \* и ангельския достигл еси чины, \* ихже житию без порока поревновал еси. \* Дерзновение имея ко Христу Богу, \* мир испроси душам нашим.

И ныне, глас 5:

**Б**ожества Твоего, Спасе, \* малу зарю обнажив \* совозшедшим с Тобою на гору, \* премирныя Твоя славы сотворил еси рачители. \* Темже ужасно зовяху: \* добро есть нам zde быти. \* С нимиже и мы Тебе преображшагося, Спаса Христа \* поем во веки.

Тропарь, глас 4:

**М**ученицы Твои, Господи, \* во страданиях своих венцы прияша нетленные от Тебе, Бога нашего: \* имуще бо крепость Твою, \* мучителей низложиша, \* сокрушиша и демонов немощныя дерзости. \* Тех молитвами \* спаси души наша.

Слава, преподобнаго, глас 8:

**П**равославия наставниче, \* благочестия учителю и чистоты, \* вселенныя свещице, \* монашествующих богодухновенное удобрение, \* Максиме премудре, \* ученьми твоими вся просветил еси, цевнице духовная. \* Моли Христа Бога спастися душам нашим.

И ныне, праздника, глас 7:

**П**реобразился еси на горе, Христе Боже, \* показавый учеником Твоим славу Твою, \* якоже можаху, \* да возсияет и нам, грешным, \* Свет Твой присносущный \* молитвами Богородицы, \* Светодавче, слава Тебе.

## НА УТРЕНИ

По 1-й стихологии седален, глас 4.

Подобен: Вознесыйся:

**В**озшед со ученики на гору и во славе Отчи облистав, \* с Моисеом Илия Тебе предстоят, \* закон и пророцы бо яко Богу служат. \* Емуже и сыновство естественное Родитель исповедая, нарицаше Сына, \* Егоже воспеваем с Тобою и Духом.

Слава, и ныне, тойже.

По 2-й стихологии седален, глас тойже.

Подобен: Удивися Иосиф:

**Н**а горе Фаворстей преобразился еси, Иисусе, \* и облак светел, протяжающа, яко сень, апостолы славою покры, \* темже и на землю ниц падаху, \* не терпяще зрети светлости неприступныя славы Лица Твоего, \* Безначальне Спасе, Христе Боже. \* Иже тогда сим Свет Твой возсиявый, просвети души наша.

Слава, и ныне, тойже.

Канон праздника, со ирмосом на 6, глас 8.

Песнь 1

**Ирмос:** Воду прошед, яко сушу, \* и египетскаго зла избежав, \* израильтянин вопияше: \* Избавителю и Богу нашему поим.

**М**оисей, на мори пророчески виде облаком и столпом древле огненным славу Господню, вопияше: Избавителю и Богу нашему поим.

**Я**ко камнем, телом покрывся, обожением Невидимаго зря, Моисей Боговидец зываше: Избавителю и Богу нашему поим.

**Т**ы на горе законней и на Фаворстей виден был еси Моисеем во мраце древле, во Свете же ныне неприступнем Божества.

**Ин канон мучеников на 4, егоже краегранесие:** Красную похваляю мучеников двоицу. Иосиф, глас 4.

Песнь 1

**Ирмос:** Моря чермную пучину \* невлажными стопами \* древний пешествовав Израиль, \* крестообразныма Моисеовыма рукама \* Амаликову силу в пустыни победил есть.

**Б**олезни тела, прехвальнии, претерпевше, твердейшим помыслом веры, к неболезненной жизни, радуящися, преставистесь, о нас присно молящися.

**Б**ожественными огражда, Аникито, оружии веры, к борению безплотных враг твердо отлучился еси и тех воинства Божественною силою потребил еси.

**В**итийское глумление, славне, и ум неискусен еллинский, разумом Божественным просвещаемь, посрамил еси и себе самага, Аникито, всего к страданию отдал еси.

**Богородичен:** Дева и прежде рожества, Чистая, и по рожестве яко воистинну явилася еси, Бога бо паче слова родила еси, святые мученики страдавшие венчавшаго.

Ин канон преподобнаго на 4, глас 8.

## Песнь 1

**Ирмос:** Израиля от работы избавил еси, Господи, \* десницею Твоею державною, \* яко онаго спасл еси, \* ныне нас спаси.

**В**ышняя премудрости сокровище стяжав в сердцах, преподобне, тоя ради обогатил еси мир учением.

**А**нгельское показал еси житие, на земли живый, и был еси храм Богу, христопроповедниче преподобне, темже и возложился Ему.

**Е**дино мысляще друг ко другу, во едину Твою веру, Христе, преподобнии проповедаху Тя в безъязычных устах, яко трубы боговещанныя.

**Богородичен:** Радуйся, Чистая Богородице, Яже прежде сущаго Слова Божия рождаши в последняя плотию, радуйся, стено всем нам и покрове чтущим Тя.

## Песнь 3

**Ирмос:** Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбче.

**О**сеняющая слава в сени первее и Моисееви беседующи, Твоему угоднику, образ бысть облиставшаго неизреченно на Фаворе, Владыко, Твоего преображения.

**С**овзыдоша Ти, Слове Единородный, вышнии апостольстии верси на гору Фаворскую, и сопредсташа Ти Моисей же и Илия, яко Божия слуги, Едине Человеколюбче.

**Б**ог Слово сый, весь землею бысть, всему Божеству смесив человечество во ипостаси Своей, юже во двою существу Моисей и Илия же видеша на горе Фаворе.

## Ин

**Ирмос:** Веселится о Тебе Церковь Твоя, Христе, зовущи: Ты моя крепость, Господи, и прибежище, и утверждение.

**П**обедив со Христом ополчения вражия, венец победный приял еси, мучениче стратотерпче Аникито.

**Н**ерадиша о плоти яко тлеющей Христовы мученицы и лютая мучения разумом твердым претерпеша.

**В**од животворных исполнени, мутныя токи прелести, мудрии мученицы, течении кровными устависте.

**Богородичен:** Вселися во утробу Твою живый на Небесех Господь и от нас всяку прелесть, Богородице, отгнал есть.

## Ин

**Ирмос:** Несть свят, яко Господь, и несть праведен, яко Бог наш, Егоже поет вся тварь: несть праведен, паче Тебе, Господи.

**К**рови каплют честныя твоя руки, и учения текут целомудреннаго языка твоего, известна воиюща по отсечении его Христа во двою естеству.

**Р**ука твоя писаньми не преста вопия, и язык учения трубит веру твою, Богоглаголиве трблаженне: Бог бо бе обоя движа, слагая глаголати.

**Т**реми убо телесы, во единой же души, единомудренно сопротивистесе, отцы чуднии, зле отъемлющим Христовы страсти и сугубое действо.

**Богородичен:** Жены убо раждают, Мати Дево Чистая, но не ктому девы пребывают, якоже Ты: ниже бо едина от сих Бога породи, токмо Ты, Богородице Чистая.

**Ин кондак мучеников, глас 2.**

**Подобен:** В молитвах:

**Божественная,** вернии, и храброя ублажим супруги Христовы славная, и похвалим, яко твердыя проповедники благочестию и суца рачители, Фотия и Аникиту, и песньми и хвалами венчаем.

**Ин кондак преподобнаго, глас 6.**

**Подобен:** Еже о нас:

**Свет** трисиянный, всельшийся в душу твою, сосуд избран показа тя, всеблаженне, являюща Божественная концем, неудобопостижных разумений ты сказуяй, блаженне, и Троицу всем, Максиме, воспроповедуяй ясно, Пресущную Безначальну.

**Икос:** Подражатель явлься Спасовых страстей и Того в души твоей имея, всеблаженне, восхождения в сердце твоем возложил еси, пребогате, Той же тебе подаде благодать с Небесе. Сопротивився бо еси мучителем, мудре, мужески, Безначальную, и Божественную, и Единосущную Троицу проповедуя и обличая злославная и богоборная, безмерная претерпел еси напасти, всехвальне, языка отрезание богословнаго, преподобне, и твоя руки вкупе, не престал же еси ты со дерзновением глаголя и утверждая верная Божественными твоими учении, Троицу всем людем проповедуя ясно, Пресущную Безначальну.

**Седален мучеников, глас 4.**

**Подобен:** Вознесыйся:

**Низложше** вражия возношения терпением лютых мук, страстотерпцы, на Небесех живете ныне, радующесе, Фотие славный и Аникито блаженне. Темже ублажаетеся во веки веков, о нас молящесе Христу, творящих вашу память.

**Слава, преподобнаго, глас 3.**

**Подобен:** Божественная веры:

**Учение** Божественное держа, столп был еси Православия и держава, Богомудре, веры: во двою существу и дву хотению проповедал еси Христа Бога нашего, отче Максиме, Егоже прилежно моли даровати нам велию милость.

**И ныне, праздника, глас тойже.**

**Подобен:** Красоте девства Твоего:

**Божественная** Твоя славы сияние, якоже можаху, показал еси, Слове Божий, учеником Твоим, на Фаворстей горе преобразующийся, имиже просветихомся и мы, поюции Тя, Едине Неизменне и Безсмертне Господи. Тебе бо верою вопием: слава, Христе, Царствию Твоему.

**Песнь 4**

**Ирмос:** Из плоти Твоя лучи Божества исхождаху пророком и апостолом. Тем начальницы, поюще, взываху: слава силе Твоей, Господи.

**И**же купину сохранивый невреждену, прикоснувшуюся огню, Моисею богосиянную плоть показал еси, Владыко, поющему: слава силе Твоей, Господи.

**С**крыся зарею Божества чувственное солнце, яко на горе Фаворе видев Тя преобразующася, Иисусе мой: слава силе Твоей, Господи.

**О**гнь, не опаляя вещи телесныя, виден бысть невеществен, якоже Моисею и апостолом явился еси, Илии же, Владыко, един от двою, во дву совершенну естеству.

**И**н

**Ирмос: Вознесена Тя видевши Церковь на Кресте, Солнце Праведное, ста в чине своем, достойно взывающи: слава силе Твоей, Господи.**

**Р**аспалаеми любовию Божию, усердно пламень огня проидосте, пребывше рососою неопальни духовною, непобедимии мученицы, Божественнии молитвенницы о душах наших.

**О**твергошася тела, различными образы страдальцы стружеми, всем бо умом к Богу взираху, сим подающему терпение веры ради.

**К**репцы, яко столпы благочестия, стены вражия низложисте и града Божественнаго, мученицы, граждане бысте, вопиюще: слава силе Твоей, Господи.

**Д**реманием не воздремаете злочестия, но бодростию Божественною, мученицы, спящия всегда в смерти к свету настависте Богоразумия благодатию.

**Богородичен: Я**ко красна породила еси Краснаго, Дево Мати Чистая, красны показавшаго мученики, твердо пострадавшия и безбожие потребльшия.

**И**н

**Ирмос: Из горы приосененныя, Слове, пророк, единыя Богородицы, хотяща воплотитися боговидно усмотри и со страхом славословяще силу Твою.**

**Т**ы Моисею подобяся, Богомудре, скрижали разумно прият учений: во мрак бо вшел еси видений и обогатился еси разума светом.

**Т**ы Аврааму поревновав, Богомудре, другаго Исаака привел еси Господеви, твое жертвовав, отче, сердце во огни совестне.

**Е**динаго Христа проповедавши, отцы, единаго Сына во двою существу исповедасте, хотяща по существу и действующа обоя.

**Богородичен: Б**езлетна Сына родила еси в лето нетленно и чиста пребыла еси, рождши нас ради Воплощеннаго во утробе Твоей, Богородительнице Приснодево.

**Песнь 5**

**Ирмос: В**скую мя отринул еси от лица Твоего, Свете незаходимый, и покрыла мя есть чуждая тьма, окаяннаго? Но обрати мя и к свету заповедей Твоих пути моя направи, молюся.

**В**етийствующий язык Твоего величества не может вещати: яко бо, Держай живот и смертию Владый, представил еси на Фаворстей горе Моисея и Илию, свидетельствующия Твое Божество.

**И**же руками невидимыми создав по образу Твоему, Христе, человека, началообразную Твою в создании доброту показал еси, не яко во образе, но яко Сам Сый по существу, Бог был еси и Человек.

Срастворився неслиянно, угля горящ показал еси нам Божества, поपालющ убо грехи, души же просвещающ, на Фаворстей горе, Моисея со Илиею, учеников же старейшия удивил еси.

Ин

**Ирмос: Ты, Господи, мой Свет, в мир пришел еси, Свет Святый, обращай из мрачна неведения верою воспевающия Тя.**

Премногими ранами умерщвлено тело твое, Аникито, живот тебе нестареемый, преблаженне, преподобно исходатаи.

Потребление огню жгущему был еси, о Фотие, Божественнаго сияния сопричастниче и дне незаходимаго чадо присное!

Текущих тление до конца отринуша, возжелевше пребывающа красная, единомушно, мученицы славнии.

**Богородичен: Кто может сказати Твое таинство, о Владычице Богородице? Паче ума бо и слова Бога неизреченно родила еси.**

Ин

**Ирмос: Утреннююще, вопием Ти: Господи, спаси ны, Ты бо еси Бог наш, разве Тебе, иного не вемы.**

Не усече твоего, отче, меч дерзновения, не угаси, преподобне, заточение веры твоея.

Проповедует убо Рим ревность твою, Богоносе, трубит же, преподобне, Церковь словеса твоя.

Пред князи проповедавшие Спаса, мученицы бысте произволением, Богомудрии.

**Богородичен: Источник бессмертия поем Тя, Богородице, Ты бо приснотекущий Живот миру родила еси.**

Песнь 6

**Ирмос: Очисти мя, Спасе, многа бо беззакония моя, и из глубины зол возведи, молюся, к Тебе бо возопих, и услыши мя, Боже спасения моего.**

Яко велие и страшное узресе видение днесь: с небесе убо чувственное, от земли же несравненное облиста Солнце правды мысленное на горе Фаворстей.

Прейде убо сень законная, изнемогшая, прииде же яве Христос истина,— Моисей возопи, на Фаворе видево Твое Божество.

Столп огненный — Христа преобразующася, облак же — яве благодать Духа, осенившую на Фаворе, предсказаша явленнейше.

Ин

**Ирмос: Пожру Ти со гласом хваления, Господи, Церковь вопиет Ти, от бесовския крове очищися ради милости от ребр Твоих истекшею Кровию.**

Возвышен был еси, немилостивно на древе стружемь, умерщвления дебельство отметаю, в Божественную одежду с Небесе одеваемь, мучениче Аникито.

Расторгше узы прелести, святии, внегда связани бысте крепко, терпением же и пожданием, Божественными ужи, предстателя тьмы удаviste.

Явистесе яко велищии светильницы, просвещающе лучами исцелений и зарями Божественных подвигов всю тварь, страдальцы Христовы предоблии.

**Богородичен:** Законных породила еси кроме, Всенепорочная, истинного Законоположника, Егоже моли законом греха побеждаемую душу мою уцедрити и спасти мя.

**Ин**

**Ирмос:** Из чрева адова вопля моего услышал еси глас мой и избавил еси от тли живот мой, Многомилостиве.

Удиви твое, треблаженне, исповедание, в тебе вещавый Иисус, со страждущими тебе.

Ни князей кичения, ни меча, ни огня, претящаго тебе, убоясь, преподобне, верою был еси крепок.

Не поколеба твоего столпа православия вселукавый враг, но победися и погибе.

Треплетенною твоею пращею прещение Ариево мысленно стреляется, стрелами таин Христовых.

**Богородичен:** Паче ума и слова, Дево, Питателя всех от сосцу питающи, матерних не разумела еси.

**Кондак, глас 7. Самогласен:**

На горе преобразился еси, и якоже вмещаху ученицы Твои, славу Твою, Христе Боже, видеша, да егда Тя узрят распинаема, страдание убо уразумеют вольное, мирови же проповедят, яко Ты еси воистинну Отчее сияние.

**Икос:** Востаните, ленивии, иже всегда низу поникшии в землю души моя помыслы, возмитесь и возвыситесь на высоту Божественнаго восхождения. Притецем к Петру и к Зеведеевым и вкупе со оными Фаворскую гору достигнем, да видим с ними славу Бога нашего, глас же услышим, егоже свыше слышаша и проповедаша Отчее сияние.

**Песнь 7**

**Ирмос:** Отроцы еврейстии в пещи попраша пламень дерзновенно и на росу огонь преложиша, вопиюще: благословен еси, Господи Боже, во веки.

Ныне видена быша апостолом невидимая Божества во плоти, на горе Фаворстей облиставша, вопиющим: благословен еси, Господи Боже, во веки.

Ужасошася страхом, удивльшеся благолепию Божественнаго Царства, на горе Фаворстей апостоли, вопиюще: благословен еси, Господи Боже, во веки.

Ныне неслышанная услышана быша: без отца бо Сын от Девы Отческим гласом славно свидетельствуется, яко Бог и Человек Тойже во веки.

Положением не был еси Вышняго, существом же Сын возлюблен, прежде Сый, нам приблизился еси непреложно: благословен еси, Господи Боже, во веки.

**Ин**

**Ирмос:** В пещи авраамстии отроцы персидстей, любовию благочестия паче, нежели пламенем, опаляеми, взываху: благословен еси в храме славы Твоя, Господи.

Странен подвиг прошедше, странни явистесь воистинну мудрований, славнии, плотских, Ангелом сограждане, снаследницы же Христу, великоименитии мученицы.

Терпением же и пожданием победисте всех врагов безбожных наветы и, светлы болезнями бывше, к сиянию незаходимому преставистесь, преславнии.

**Храм** Троицы Пребожественныя бывше, столпы и храмы низложиша мужески безбожных, прехвальнии, и к Небесному храму преставистеся, радующеся.

**Богородичен:** Яко пространнейши Небес, Чистая, прияла еси Слова, никакоже вместна паче ума, тесным ходящая путем, Пренепорочная, к пространству вводяща Божественныя жизни.

**Ин**

**Ирмос:** **В** начале землю основавый и Небеса словом утвердивый, благословен еси во веки, Господи, Боже отец наших.

**Ты** одежду естественнаго достоинства кровию твоею украсил еси, Богомудре, молчащ язык, отче, и вещающ, явление подавая сею словес твоих.

**Гроб** ваших не остави языков, земля же дальняя не скры словеса, якоже пишет Давид в песнех, во всю воистинну землю проповедашася.

**Якоже** злато, трие искусившеся во огни искушению оных, чистейшу веру вашу возрастисте Христу, отцы честнии.

**Богородичен:** Тайны образ – Девы в Синаи Ты прообразил еси купиною горящею и неопалемою: благословен еси, Господи, Боже отец наших.

**Песнь 8**

**Ирмос:** Седмерицею пещь халдейский мучитель Богочестивым неистовно разжже, силою же лучшею спасены, сия видево, Творцу и Избавителю вопияше: отроцы, благословите, священницы, воспойте, людие, превозносите во вся веки.

**Услышавше**, Владыко, от Отца свидетельствуема, и яко человеческа твердейша зрака зрети лица Твоего блистания не терпяще, Твои ученицы на землю ниц падаху, со страхом поюще: священницы, благословите, людие, превозносите во вся веки.

**Царствующим** еси Царь прекрасен и иже всюду владающим Господь силен, Блажен и во свете живый неприступнем, Емуже ученицы удивльшеся, Моисей же и Илия вопияху: отроцы, благословите, священницы, воспойте, людие, превозносите во вся веки.

**Яко** Небом владущему, и землею господствующему, и над преисподними область имущему, Христе, предсташа Ти: от земли убо апостоли, яко с Небесе же Фесвитянин Илия, Моисей же от мертвых, поюще согласно: людие, превозносите во вся веки.

**Уныние** раждающия печали на земли оставиша апостолов избранныи, Человеколюбче, яко Тебе последоваша, ко иже от земли предложению Божественнаго жития. Темже и, по достоянию Твоего Богоявления улучивше, пояху: людие, превозносите Его во веки.

**Ин**

**Ирмос:** Руце распростер, Даниил львов зияния в рове затче, огненную же силу угасиша, добродетелию препоясавшеся, благочестия рачители отроцы, зывающе: благословите, вся дела Господня, Господа.

**Тверд** ум, мудрии, показующе, зверей стремления не убоястеся, врения коноб не ужасостеся, ни удов отсечения, ни мучителей прещения, вопиюще: благословите, вся дела Господня, Господа.

**И**сцеляете страсти верных, изобразивше страсть блаженную вашими страстьми, святии, и отъемлете недуги, и отгоняете лютыя духи, вопиюще: благословите, вся дела Господня, Господа.

**Д**воице страдалец предобрая Троицу Несозданную исповеда, и тьмославных погуби супостат воистинну полк, и тьмам мысленных совокупися, поющии: благословите, вся дела Господня, Господа.

**Богородичен:** Святая Дево, Яже Бога Пресвятаго породши, венчавшаго благодатию святыя Твоя мученики, спаси, освяти нас, усердно поющих: благословите, вся дела Господня, Господа.

**Ин**

**Ирмос:** На горе святей прославльшася и в купине огнем Приснодевы Моисеови тайну явльшаго, Господа пойте и превозносите во вся веки.

**З**арю Божественнаго учения в сердца прием, Богомудре, просвещенней разума обогатился еси и премудрости сокровище вложил еси в душу твою, отче.

**У**чения предложив, Богоблаженне, ереси отгнал еси от среды и, Христовым поревновав страstem, был еси жертва чиста и приятна Богу произволением.

**В** чистоте соблюдоше житие и верою украсивше дела, Небесныя славы сподобистесь, честнии отцы, темже воспеваеи Христа во веки.

**Богородичен:** Радуйся, двере и одушевленный облаче; радуйся, горо, и купино, и свещнице; радуйся, храме, и престоле, и раю; радуйся, рождающая Содетеля всех, Благословенная.

**Песнь 9**

**Ирмос:** Устрашися всяк слух неизреченна Божия низхождения, яко Вышний волею сниде даже и до плоти, от девического чрева быв Человек. Темже Пречистую Богородицу, вернии, величаем.

**Д**а Твое покажеши яве неизреченное второе снитие, яко да Вышний Бог явишися, стоя посреде богов, апостол на Фаворе, Моисея же и Илию, неизреченно осиял еси. Темже вси Тя, Христе, величаем.

**П**риидите, Мне покоритесь, людие, возшедше на гору святую пренебесную, невещественно станем во граде Живаго Бога и узрим мысленно Божество невещественное, Отца и Духа, в Сыне Единородном облистающее.

**П**ривлекл еси любовию мя, Спасе, и пременил еси Божественным Твоим желанием, но попали огнем невещественным грехи моя и насытитися Твоя пища сподоби, да, обою играя, величаю, Блаже, величия Твоя.

**Ин**

**Ирмос:** Камень нерукосечный от несекомья горы, Тебе, Дево, краугольный отсечеса, Христос, совокупивый разстоящаяся естества. Тем, веселящеса, Тя, Богородице, величаем.

**С**е светлый, и светоносный, и исполнен благодати день возсия Фотия Божественнаго и Аникиты, вся просвещая в нем празднуюющия светозарная сих страдания.

**Я**вистесь, яко углие, всю вещь злобы попадающе, явистесь, яко честнии агнцы, вольне закалаеми и Агнцу, вземлющему грехи, приводими.

**Р**аны ваша, страстоносцы, страдания, и болезни, и паче ума терпение, и подвиги, и кончину преславно славяще, днесь вси возрадуемся.

**П**роцветоша во удолиях преподобно мученических, якоже шипок, преудобрении страдальцы, и сердца благоухают благочестивых духом, смрад прелести отгоняюще.

**Богородичен:** Просвети нас, рождающая Свет непреступный, Дево, исполни нас веселия, и радости, и Божественного разума, чистым сердцем Тя богомудренно величающая.

**Ин**

**Ирмос:** Проявленное на горе законоположнику во огни и купине Рождество Приснодевы в наше, верных, спасение, песнями немолчными величаем.

**Т**ы безстрашием и видением, треблаженне, научил еси словесы нас жизни вечныя, столп одушевлен Православия мирови, исповедание твое оставил еси.

**Т**ы, Финесу подобяся, Богоносе, яко инем копием, мечем слова новонасажденную посекаеши веру, отревая хулящая Христа.

**В**оистинну прославистеся, Богоноснии отцы, ранами и биении, гонении и бедами, во узах же, и темницах, и железах, и в заточениих пострадавшие.

**Богородичен:** Купину, горящу огнем и неопаляему, предзряше древле Моисей, Богомати Дево, богоприятну прообразуя Твою утробу, приемшую нетленный Огнь.

**Светилен святого.**

**Подобен:** Свете неизменный:

**Т**руба явился еси премудрости, благогласным языком твоим сопротивных ужасая полки, Максиме, свет монашествующих, темже, твоими питающесея словесы, разум познаваем сущих.

**Слава, и ныне, праздника:**

**С**вете неизменный, Слове, Света Отца нерожденна, в явленнем свете Твоем, днесь на Фаворе Свет видехом Отца, Свет и Духа, Светом наставляющего всю тварь.

**На стиховне стихиры праздника, глас 2.**

**Подобен:** Доме Евфрафов:

**П**росиял еси, о Христе, бело паче снега, Твое обнажая учеником существо непреступныя славы Твоея.

**Стих:** Твоя суть небеса и Твоя есть земля.

**П**оказати учеником славу Твою восхотев, с Моисеем и Илиею на горе Фаворстей яко видеша Тя, Спасе, ужасошася.

**Стих:** Фавор и Ермон о Имени Твоем возрадуется.

**Д**несь Христос на горе Фаворстей Адамово обновль омрачившееся естество, просветив, богосодела.

**Слава, и ныне, глас и подобен тойже:**

**Г**ора Божия Фавор о Имени Твоем, Спасе, радуется, Отцу возлюбленна Тя Сына проповеда.

## НА ЛИТУРГИИ

Блаженны праздника, песни 7-я и 8-я от обоих канонов, со ирмосом на 6.

**Облиставшися** Светом неприступныя славы на Фаворстей горе, апостоли Христу вопияху: отец наших Боже, благословен еси.

**Сиянием** Божественнаго шума, и росодательным облаком, Христе, и зарею Твоею наслаждаеми, апостоли пояху: отец наших Боже, благословен еси.

**В** неприступнем свете, яко виде Тя Петр, на Фаворстей горе облиставша, Христе, возопи: отец наших Боже, благословен еси.

**Услышавше**, Владыко, от Отца свидетельствуема ияко человеческа твердейша зрака зрети лица Твоего блистания не терпяще, Твои ученицы на землю ниц падаху, со страхом поюще: священницы, благословите, людие, превозносите во вся веки.

**Царствующим** еси Царь, прекрасен и иже всюду владычим Господь силен, Блажен и во свете Живый неприступнем, Емуже ученицы удивльшися, Моисей же и Илия вопияху: отроцы, благословите, священницы, воспойте, людие, превозносите во вся веки.

**Яко** Небом владущему, и землею господствующему, и над преисподними область имущему, Христе, предсташа Ти: от земли убо апостоли, яко с Небесе же Фесвитянин Илия, Моисей же от мертвых, поюще согласно: людие, превозносите во вся веки.

### Тропарь праздника, глас 7:

**Преобразился** еси на горе, Христе Боже, \* показавый учеником Твоим славу Твою, \* якоже можаху, \* да возсияет и нам, грешным, \* Свет Твой присносущный \* молитвами Богородицы, \* Светодавче, слава Тебе.

### Тропарь мученицы, глас 4:

**Мученицы** Твои, Господи, \* во страданиях своих венцы прияша нетленные от Тебе, Бога нашего: \* имуще бо крепость Твою, \* мучителей низложиша, \* сокрушиша и демонов немощныя дерзости. \* Тех молитвами \* спаси души наша.

### Тропарь преподобнаго, глас 8:

**Православия** наставниче, \* благочестия учителю и чистоты, \* вселенныя светильниче, \* монашествующих богодухновенное удобрение, \* Максиме премудре, \* ученьми твоими вся просветил еси, цевнице духовная. \* Моли Христа Бога спастися душам нашим.

### Кондак мучеников, глас 2:

**Божественныя**, вернии, и храбрыя ублажим супруги Христовы славныя, и похвалим, яко твердыя проповедники благочестию и суща рачители, Фотия и Аникиту, и песньми и хвалами венчаем.

### Кондак преподобнаго, глас 6:

**Слава:** Свет трисиянный, всельшийся в душу твою, сосуд избран показа тя, всеблаженне, являюща Божественная концем, неудобопостижных разумений ты сказуяй, блаженне, и Троицу всем, Максиме, воспроповедуяй ясно, Пресущную Безначальну.

Кондак праздника, глас 7:

**И ныне:** На горе преобразился еси, и якоже вмещаху ученицы Твои, славу Твою, Христе Боже, видеша, да егда Тя узрят распинаема, страдание убо уразумеют вольное, мирови же проповедят, яко Ты еси воистинну Отчее сияние.